

Skatterådimit najoqutassiaq.

**Pappiaraatit nalingisa allanngorarnerisigut iluanaarutit/ajunaarutit akileraaruteqaa-taasussat naatsorsornerat.**

Piginneqatigiiffinnut il.il. Aningaasarsianit akileraarutit pillugit landstingip inatsisaani § 1, imm. 1, nr. 3-10mi taaneqartunut atuuttussanngorlugu inatsimmi tassani § 14-imi imm. 2 ilanngunneqarsimavoq. Tamatuma kingorna piginneqatigiiffiit il.il. Taaneqartut obligationit pisortatigoortunit, privatimik pantebrevinit pisassanilluunniit allanit nalingisa allanngorarnerisigut iluanaarutisianit piginnikkunnaarnermi takuneqarsinnaasunit - ilaatigut tuninerisigut, naafferarlugit akilersornerisigut makitsinikkulluunniit pigiunnaarnerisigut. Tamanna peqatigalugu aalajangerneqarpoq ajunaarutit takuneqarsinnaasut pappiaranit taakkunannga pisut piginneqatigiiffinnut il.il. Ilanngaatigineqarsinnaasut.

Aalajangersagaq iluanaarutinit/ajunaarutinit 1.7.1985-ip kingorna takuneqarsinnaalersunut atuuttussaavoq.

1.7.1985-imi naligititaq

Iluanaarutit/ajunaarutit 1.7.1985-ip kingorna pinngorsimasut taamaallaat aningaasarsianut akileraaruteqaa-taasussanut ilanngunneqartussaammata aalajangerneqarpoq pappiaraatinut 1.7.1985-imi pigineqartunut iluanaarutinit/ajunaarutinit naatsorsuineri pissarsiarineranni akiusimasunut taarsiullugu 1.7.1985-imi nalingat atorneqassasoq.

Obligationinut Børsen-imi allattorsimasut 1.7.1985-imi Børsen-imi nalingat atorneqassaaq.

Pappiaranut allanut tamanut ullormi tassani (1.7.1985imi) nalinginnarmik tuniniaanermi nalingat atorneqassaaq.

FIFO malillugu periaaseq

Iluanaarutinit ajunaarutinilluunniit aningaasarsianut akileraaruteqaa-taasussanut ilanngutas-sanik naatsorsuineri taamaalilluni pappiaqqat pissarsiarneranni nalingat (1.7.1985-ip kingorna pissarsiarineqarsimasunut) imaluunniit 1.7.1985-imi nalingat (1.7.1985 sioqqullugu pissarsiarineqarsimasunut) atorneqassaaq.

Tamannali atorsinnaangilaq obligationinut tuniniaanikkut/makitsinikkut pigiunnaakkanut piginneqatigiiffik arlaleriarluni serie-mi ataatsimi (normoqatigiinni) pisisarsimappat.

Taamaattumik skatterådip aalajangiuppaa pissutsini taamaattuni periaaseq FIFO-mik taaneqartartoq akileraarusiineri atorneqassasoq.

Periaaseq taanna malillugu obligationit pisoqaanerit tamatigut siulliullugit tunineqartarput-/makinneqartarput taamaattumillu obligationit pisoqaanerusut taaku pisaarinerani akiitassapput iluanaarutit ajunaarutilluunniit naatsorsornerini atorneqartussat aammalu obligationit taakku ilanngullugu pigisanit peerneqassapput.

Nammineerluni nalunaarsuinermit bilagi

Aalajangersakkap nutaap ingerlanneqarnissaa - akileraartartunit akileraarnermilu oqartussasunit - siunertaralugu skatterådi aalajangerpoq piginneqatigiiffinnut il.il. pigineqartunut nammineerluni nalunaarsuinerit akileraaruserneqarneraani bilagimik immikkut ittumik immersui-

nissamik piumasaqartoqassasoq, aalajangersakkami pappiarnut taaneqartuni makkunannga paasissutissaqassalluni:

Pappiarnut ukiup aallartinnerani pigineqartunut (imaluunniit 1.7.1985-imi pigineqartunut)

- a. Aqqa nalingalu allassimasoq
- b. Qanga pisaarineqarnera (soorlu "1.7.1985"-ip siornagut)
- c. Pisaarinerani nalinga (imaluunniit 1.7.1985-imi nalinga)

Pappiarnut ukiup ingerlanerani pisaanut

- a. Aqqa nalingalu allassimasoq
- b. Qanga pisaarineqarnera
- c. Pisaarinerani nalinga

Pappiarnut ukiup ingerlanerani tunineqarsimasunut - tamakkiisumik tunisinermi/makitsinermi imaluunniit ilaannakuusumik naafferarlugit akilersornerisigut

- a. Aqqa nalingalu allassimasoq
- b. Tuninerani akia
- c. Iluanaarutit/ajunaarutit akileraartueqaataasussat

Pappiarnut ukiup naanerani pigineqartunut

- a. Aqqa nalingalu allassimasoq
- b. Qanga pisaarineqarnera (soorlu "1.7.1985"-ip siornagut)
- c. Pisaarinerani nalinga (imaluunniit 1.7.1985-imi nalinga)

Bilagip qanoq isikkoqarnissaanut qanorlu sananeqarnissaanut piumasaqaateqartoqanngilaq taamaallaalli paasissutissat qulaani taaneqartut bilagimi takuneqarsinnaassapput. Bilagi, assersuutigalugu naatsorsuuserinermi inatsimmi piumasarineqartunik naammassinnittoq peqatigalugulu paasissutissanik qulaani pineqartunik imaqartoq akuerineqarsinnaavoq.

Immikkut pisoqarnerani

Immikkut pisoqartillugu skatterådip akuersissutigisinnaavaa iluanaarutit/ajunaarutit paasineqanngitsut aningaasarsiat akileraartueqaataasussat naatsorsornerini ilanngunneqarnissaat.